

Jongo Sela Sogo Wabo Aşani Pas

Hasia nedebo tau sabo po

Te e pas Jongo aga abagi Gaius agabolo aşena toloyu, tama te bidi Gaiusgo te Godigo po sela pabo bidi dabe tau sabo şede buba hwi po wali. Jongo gasa bidi side me po aşeyu, te bidide dow dao wabo po wali. Te bidi me nogi da, te Diotrefes dao.

Dago te Godigo şe ebo bidi dabe tau sabo şe inao

¹Ena monu dabe bidiyu tama ena Jisasgo şe ebo tobolu bidi, eno e po Gaius nagebolo aşena tolobao. Nage eno abagi mu dao, eno homu mu eyu nage dali godolo mu ebo dao.^a

²Abagi mu, eno homugo nago şe ebo tigidali dwagi yai emainao, tama nage me bugagia bidimainao. Eno koneai, nage te God dali bidiyu, tama nago noma bugagia bidibao, tama eno homugo nago tigi me te tiwai bugagia bidao. ³Te nago noma bugagia bidibo pode, abagi dabe meba augwali ena bidibo digi sabolodu geani, tama augwaligo te po widu geai, nage te mu pode homu keş pai bidi dao. Eno tama po odolama, tama eno dwagi yai homu yai. Mu tama eno koneai, sesemane sogo nago te mu po naga wali peyu bidibo dao. ⁴Awe, eno wai dabe augwaligo mu po wali peyu bidibo te po eno odu gebaso da, teda eno dwagi yai homu pemene mu ebo dao. Tama gasa po odobode dwagi yai homugo te dwagi yai homu ebo aiyaba elalubo menio.

Gaius agai dwagi yai şe yai

⁵Abagi mu, nago homu mu naga eyu, tama tigidali ama dabe augwali tau sabo şe yai. Tama tiyu, te nago konesişwai bage augwali gasa buludu asali digi, augwali me nago tau siyu tebo dao. ⁶Tama te nago tau sali bidi dabe augwaligo te ede bidibo Godigo we bidibolo te nago augwali

^a 1:1 Tpi 19:29; Rom 16:23; 1 Ko 1:14

dali dwagi yai homu eyu tau sabo şe ebo po pusali. Tama te tobage bidi augwali Godigo po haniani buluba sela peyu, tama nago bidibo digi asobo si, teda nosali augwali gasaba bugagia ma pomainogo eyu nago augwali tau sao. Augwaligo Godigo şe ebo dao. ⁷Augwaligo te şede Kraisgo po wagi pai. Tama peyu, tama augwaligo te Godigo po wali pişabo bagego augwali tau sabo hagela yai, te sabeo. ⁸Tama tibaso, da Godigo po wali pabo we bidi, dago augwali tau sao. Te kolesagade dago augwali dali hodobo şe deli eyu, tama te Godigo mu po te haniani buluba tedela paibao.

Bidi nogi Diotrefes agai dwai kolesaga yai

⁹Eno po meba te nago bidibo digi bidibo Godigo we bidibolo aşena tolai. Tiali goli te bidi Diotrefes aga augwaligo polalubo bidi bidainogo homu eyu tama agai eno wabo po odobo menio. ¹⁰Tama tibaso, ena dage bidibo digi sabalobode, eno dagebolo agai te yali kolesaga te po hanilaibao. Agai nogi posobo dwai po haniani da dali wabo dao. Tama agai homugo te şe ebo naga usu egobeo. Meni. Godigo po pusigi pabo bidi dabe, dago ama dabe, augwali teba asobo si agai augwali beba odasa pabo menio. Tama bidi meba augwaligo te asai ama dabe beba odasa painogo ebaso, agai augwali dali te tigio olama, tama agai augwali te Godigo we bidi hani tomode me bidigio olama, augwali sela şabo dao.

Bidi nogi Demetrius agai dwagi yai kolesaga yai

¹¹Eno abagi mu, nago te dwai kolesaga ebo bidigo kolesaga wali pelamuo. Nago dwagi yai kolesaga wali pao. Dwagi yai kolesaga ebo bidi, te bidi Godigo bidi dao. Dwai kolesaga ebo bidi, agai God konebeo. ¹²Te bidi Demetrius, agade tigidali we bidi augwaligo aga nogi ugwaba sabo po weyu, “Te aga dwagi yai bidi dao,” te po wabo dao. Tama aga homu mu eyu doloba pai kolesaga ebo te Godigo mu po dolo si dao. Tama da me dago aga dwagi yai bidi dao po weyu, aga nogi ugwaba sobao. Tama nago koneai, dago po te mu po dao.

Po silagasu wabo po

¹³Eno nagebolo pusubo po hauwa me elalui dao. Tiali goli eno te po nagebolo aşena tolobo hagela homu ebo. ¹⁴Eno nage tamadi suagasobo homu ebao. Tama eyu, tama nago gesabide eno te po pusaibao.

¹⁵Eno homugo nago homu dwagi yai elama bidao. Nago ede bidibo abagi dabe augwali tigidaligo nagebolo siade dao po obao. Nago te nage dali bidibo dago abagi dabe augwali deli delibolo siade dao po wao. Te tama dao.